

3  
Na osnovu člana 2. Zakona o komunalnim djelatnostima ("Službeni list SRBiH", broj 20/90) i člana 26. Statuta općine Tuzla ("Službeni glasnik općine Tuzla", broj 2/99. i 9/00), Općinsko vijeće Tuzla, na sjednici od 27. februara 2004. godine, donosi

## ODLUKU

o kriterijima i uslovima utvrđivanja novčane naknade za obezbjeđenje angažovanog kapaciteta za priključivanje novih korisnika na vodovodnu i kanalizacionu mrežu

### Član 1.

U cilju obezbjeđenja sredstava za unapređenje postojećih komunalnih objekata i uređaja u oblasti vodosnabdijevanja i odvođenja otpadnih voda, ovom Odlukom se utvrđuju uslovi i kriteriji za plaćanje naknade za priključenje novih korisnika na vodovodnu i kanalizacionu mrežu.

### Član 2.

Naknada za obezbjeđenje angažovanog kapaciteta za priključenje novih korisnika plaća se na individualne stambene objekte, kolektivne stambene objekte, stambeno-poslovne objekte i poslovne objekte.

### Član 3.

Korisnici vodovodne i kanalizacione mreže, u smislu ove Odluke, već su izgrađeni i novi individualni i kolektivni stambeni i poslovni objekti.

### Član 4.

Za priključenje korisnika na sistem vodosnabdijevanja i odvođenja otpadnih voda podnosi se zahtjev putem ovlaštenih fizičkih i pravnih lica JKP "Vodovod i kanalizacija" Tuzla, u skladu sa odredbama Odluke o vodovodu i kanalizaciji na području općine Tuzla.

Uz zahtjev se prilaže projektna i ostala dokumentacija iz koje se može utvrditi potreban angažovani kapacitet.

### Član 5.

O uslovima plaćanja naknade za obezbjeđenje angažovanog kapaciteta za priključenje novih korisnika na vodovodnu i kanalizacionu mrežu zaključuje se pismeni ugovor.

## Član 6.

Osnov za obračun naknade za obezbjeđenje angažovanog kapaciteta je potrebna količina pitke vode izražena u  $m^3$ , odnosno lit/sek.

## Član 7.

Visina naknade za obezbjeđenje angažovanog kapaciteta, u skladu sa odredbama ove Odluke, utvrđuje se ovisno od namjene objekta, i to:

a) Individualni stambeni objekti, stambene jedinice u kolektivnim stambenim i stambeno-poslovnim objektima, objekti obrazovanja, đački domovi, zdravstveno-socijalne organizacije, objekti kulture i fizičke kulture

b) Privredni i poslovni objekti

Visina naknade za objekte iz tačke a) ovog člana iznosi 30 KM/ $m^3$

Visina naknade za objekte iz tačke b) ovog člana iznosi 60 KM/ $m^3$

## Član 8.

Sredstva prikupljena po osnovu naknade za obezbjeđenje angažovanog kapaciteta, u skladu sa ovom Odlukom, koristiće se za izgradnju novih izvorišta, izgradnju novih glavnih cjevovoda, glavnih dovoda i uređaja za prečišćavanje, rekonstrukciju i modernizaciju postojeće vodovodne mreže, postrojenja, rezervoara, uređaja i izgradnju nove i rekonstrukciju postojeće kanalizacione mreže i neće ulaziti u ukupan prihod JKP "Vodovod i kanalizacija" Tuzla.

Sredstva iz prethodnog stava evidentiraju se na posebnom računu JKP "Vodovod i kanalizacija" Tuzla, te se kvartalno (svaka tri mjeseca) uplaćuju na žiroračun općine Tuzla i čine sastavni dio Budžeta općine Tuzla, koji je predviđen za komunalnu infrastrukturu.

Raspoređivanje sredstava, prikupljenih po ovom osnovu, vršiće Općinski načelnik na prijedlog Službe za komunalne poslove, izgradnju i poslove mjesnih zajednica, isključivo u svrhu predviđenu članom 8. stav 1. ove Odluke, u skladu sa Planom i Programom vodosnabdjevanja općine Tuzla.

## Član 9.

JKP "Vodovod i kanalizacija" Tuzla dužno je da svoja akta uskladi sa ovom Odlukom u roku od 15 dana.

## Član 10.

Odluka stupa na snagu osmog dana od objavljivanja u "Službenom glasniku općine Tuzla".

OPĆINA TUZLA

Općinsko vijeće

Broj: 01-23-1756-2004.

27. februar 2004. godine

PREDSJEDAVAJUĆI

Ilija Jurišić